

De Heinzemänncher vun Kölle

För de Pänz vun hügg verzallt vum Ingeborg Nitt

An enem schönen Ovend, koot bevör de Arbeit lossing, soße de Heinzemänncher Pipp, Drickes un Fritzche beienein beim Ovendfröhstück oder Fröhstückovendesse. Et Fritzche wor noch ärg jung un grad neu bei die Brummese Pipp un Drickes en de Computergrupp gekumme. Dröm kann mer secher verstonn, dat et e bessche iggelig wor. „Wä sin mer, wat maache mer“, frogten et Fritzche. De Heinzemänncher sin mer“, saht der Pipp. Der Drickes feel im en et Wood: „Mir Heinzemänncher helfe de Minsche.“ „Ävver wie geiht dat dann?“ frogten et Fritzche, „mer sin doch ganz allein.“ Dodrop moot der Pipp esu laache, dat hä baal vum Stohl gefalle wör. Ävver em letzte Momang kunnt hä sich noch fasshalde. Dat wor god su, denn hä moot jo noch arbeide. Un e Heinzemännche, dat om Boddem litt, schlöf tirektemang en. „Nä, nä, mi Ströppche“, meinte der Drickes, „vun uns gitt et erer vill.“ Der Pipp un der Drickes üvverlahnten un meinten, et wör et Bess, wann se et Fritzche ens met durch Kölle nöhme, dat et alles söch un die ander Heinzemänncher kennelierte. „Drickes, ich han Kadangs“, jöömerten dä Klein, „wo sin mer nor?“ Dat kunnt mer verstonn, wor et doch kald un düster. Usserdäm wor et Fritzche et eeschte Mol en der Minschewelt! „Mer sin jetz bei der Polizei“, verklärte der Drickes, „die krige schläächte Lück, die ander Minsche jet welle.“ „Un wat maache de Heinzemänncher? Ich daach, de Minsche dörfte uns nit sinn“, saht et Fritzche ganz verbasert un kratzte sich am Kopp, su dat sing rude Mötz verrötschte. Die hatte all Heinzemänncher aan, för unsichbar zo sin. Der Pipp rökke de Mötz widder grad un petschten et Fritzche en der Buch: „Mer helfe de Poliziste, schläächte Minsche zo finge. Mer söke em Internet, lese Breefe, schriewe Emails an de Geheimdeenste un noch vill mih.“ Der Drickes wor am Giefele: „Un wenn de Minsche su richtig fuul sin, dann zänke mer se öm su mih. Mer stelle inne der Wecker oder schriewe inne Breefe vun ehrem Chef. Jo“, meinte der Drickes, „et bess kann dat der Lambäät-met-dem-Lasso. Dä hät sugar ens ene schläächte Minsch engefange un em Büro vum de fuule Poliziste verstoche. „Wä es der Lambäät-met-dem-Lasso?“ frogten et Fritzche. „Hä es unse Baas un dräg de Krunemötz. Hä hät dich en uns Grupp gedon un bestemmp, wo mer en der Naach hingonn müsse.“ Se laachten hätzlich üvver der neuste Erfolg vum Lambäät, dä e paar Panzerknacker em Büro vum Chef verstoche

hat. Wie se genug gesinn hatte, troke die Drei wigger noh der Spillzeugfabrik.

Se schleche leis durch de Fabrikshalle, en denne sich kein Maschin rebhte un wägte. „Wat sin dat för Tön?“ fispelten et Fritzche. „Dat sin de Spillzeugheinzemänncher. Die baue Spillzeugautos, nihe Teddys, falde Kartons un zorteere se all för et Geschäft. Un se han luuter noch Zigg för ze spille“, küümte der Pipp. „Ich well metspille“, reef et Fritzche e bessche ärg laut un hüpften eröm. Der Drickes loote dat spierige Kääliche an un saht: „Nä, wenn do noch alles sinn wells, dann müsse mer wigger. Un usserdäm müsse mer arbeide. Dat darfs do nit vergesse.“ Dat wor et Engk vum Besök en der Spillzeugfabrik. Et Fritzche leet sing große, spetze Ohre hange. Si Geseech, dat ald deefe Falde hatt, ovschüns hä noch jung wor, laachte eesch widder, wie se bei de Döktersch aankome. „Wat sin dat dann för juxige, aale Heinzemänncher?“ laachte et Fritzche. „Pssst! Hee müsse mer ganz leis sin“, schant der Drickes. „Woröm?“ flog dä Klein op, „die andere sin doch och laut, un usserdäm, die sinn komisch us met ehre lange, wieße Bäät un dä große Brelle.“ Der Pipp saht su leis hä nor kunnt: „Dat sin die Äldste vun de Aale, die sin esu klog wie mer drei zesamme nit sin.“ „Wat han die dann zo explizeere?“ lenkten et Fritzche, däm die Schwaaderei üvver die kloge un wichtige aale Männer gruselig wor, av. Der Drickes kräg widder neue Mod un saht: „Se loore en de Krankenakte un prüfe, ov der Dokter och alles richtig gemaht hät. Mänchmol maache se Vörschläg, wie mer de Minsche widder gesund maache kann. Un se schrieve op, wat en dingem Blod zo sinn es, ov do gesund ov malätzig bes.“ Flöck flitzte die drei Heinzemänncher wigger nohm nöchste Huus wie se meteins jet Langes, ärg Huhes en der Himmel oprage soche. „Ich ben esu bang, wat es dat nor“, jöömerte et Fritzche, däm de Botz bävte. „Dat, Fritzche, es en Raket“, saht der Pipp stolz, „mir Heinzemänncher han ööntlich metgeholfte, se ze baue.“ „Jo“, küümte der Karl, „un su en Raket muss rein gehalde wääde. Vun benne un vun usse. Dröm putze mir Heinzemänncher jetz die Raket. Nor der Antun-met-dem-Astronautenaanzog versök luuter, se besser zo maache un braselt am Motor eröm.“ „Kutt, lo’mer gonn“, saht der Pipp, „söns gläuv der Tünn, mer welle im de Arbeit fottnemme, un ich krige nix mih vun singer leckeren Appeltaat.“ En Gedanke soh hä e Stöck met besonders decke Äppel vör sich un revv sich singe decke Buch. Dann gingke se loss. Bei dem Knüöver vun Computerspillcher frößelte die Grupp jetz zick einer Woch. Se

probeete de Spillcher us, knespelten dran eröm un mahte se noch besser. Et Fritzche moot noch liere, wie mer e Spill knuuv un der Minsch gläuve liet, dat hä alles selvs gemaht hätt. Der Pipp reparaete dä aale Computer, dä luuter kapodding. Wie se medden bei der Arbeit wore, hoot se meteins ene Krach un jöckte flöck wie ene Bletz de Kellertrapp erav en et Heinzemänncherich. Et Fritzche moot sing Mötze fasshalde, die im luuter üvver de Auge rötschte, un der Pipp hatt Moleste, singe ärg decke Appeltaatsbuch en der Iel durch der Kamin zo däue. Der Karl wor flöcker un hätt beinöchs sing Fründe usgesperr. Et wor dat neugeerige Dööchterche vum Knüüver gewäs, dat die ärm Heinzemänncher su verschreck hatt. Dat kleine Weech met fussige Zöpp un Spronzele wie et Pippi Langstrump woodt et Naachs luuter wackerig un hoot Tön em Computerzemmer vun singem Vatter. Et Lische wollt partout sinn, wä en der Naach luuter singem Vatter bei der Arbeit helfe dät. Vörwetzig schlech et am nächste Ovend, bevör de Heinzemänncher kome, noh der Kellertrapp un laht sing bungkte Ömmere drop. Et hoffte, su de Heinzemänncher sinn ze künne, die jo wäge ehre Mötze unsichbar wore. Un verhaftig – wie die Drei en der Naach vergnög eroplaufe wollte för zo arbeide, letschte se op de Ömmere us un feelen holderdebolder de Trapp erav. Se jöömerten un bälkte. Flöck maht et Lische et Leech aan un soh drei bang Kälcher, die ehr Mötze am Söke wore un ielig en der Kamin jöckte. Der Pipp, der Karl un et Fritzche verzallten dem Lambäät-met-dem-Lasso tirektemang, wat passeet wor. Se zidderten un bävten am ganze Liev vör Angs un och vör Oprägung. Denn se stundte en enem große Saal, en däm all Heinzemänncher beienein wore. Se frogte, wat se jetz dun sollte. Denn bei däm Knüüver vun Computerspillcher kunnte se nit mih arbeide. Der Lambäät üvverlaht nit lang, hee kunnte se nit blieve. Denn de Heinzemänncher däte jo höösch arbeide. Dröm moote se vun Kölle fottgonn. Hä reef dat ganze Schmölzche zesamme un all wanderte nohm Rhing un gingke op e Scheff för en an ander Stadt zo fahre, wo se de Minsche helfe künnte. Die fuul Kölsche, die e genöglich Levve hatte, weil andere för se gebraselt hatte, moote op eimol widder selver arbeide. Jetz verstundte se eesch, wiewill de Heinzemänncher för se gedon hatte. Un se hatte et inne nie gedank. Dröm krähte de Kölsche e ärg schlääch Gewesse un se

versökte, besonders god zo arbeide. Un dat Dööchterche vun däm Knüüver? Et wor ärg bedröv, weil et gehoff hatt, dat de Heinzemänncher met im spille däte. Un jetz wore se fott! Ävver et hatt och Glöck. Denn singe Vatter hatt et geschaff, Super Mario Kart zo verkaufe un trok met im en en ander Stadt. Un wä weiß, villeich gov et do och Heinzemänncher?